



vischnaunca da
sumvitg

Lescha da sepultura e santeri

C u n t e g n

I. Determinaziuns generalas	3
Art. 1 Validitad	3
Art. 2 Survigilanza	3
Art. 3 Incumbensas	3
II. Determinaziuns specificas davart uorden da sepultura	3
Art. 4 Metter en vischi	3
Art. 5 Transport dalla bara	3
Art. 6 Temps da spetga	3
Art. 7 Liug da sepultura	4
Art. 8 Lubientscha speciala per satrar	4
Art. 9 Tucchiez	4
Art. 10 Sepulturas	4
III. Determinaziuns specificas davart uorden da santeri	4
Art. 11 Santeris	4
Art. 12 Formaziun dil santeri	4
Art. 13 Register da fossas	5
Art. 14 Disposiziun dallas fossas	5
Art. 15 Mesiras e distanzas dallas fossas	5
Art. 16 Fossas specialas	5
Art. 17 Occupaziun dallas fossas	5
Art. 18 Ruaus da fossa	5
Art. 19 Exhumaziun	5
Art. 20 Revocaziun da fossas	6
Art. 21 Qualitad dils vischals	6
Art. 22 Schurmetg dil santeri	6
IV. Determinaziuns executoricas	6
Art. 23 Disposiziun penala	6
Art. 24 Mieds legals	6
V. Determinaziuns finalas	6
Art. 25 Abrogaziun	6
Art. 26 Approbaziun e vigur	7

I. Determinaziuns generalas

Art. 1 Validitad

¹ Questa lescha regla igl uorden da sepultura e santeri ella vischnaunca da Sumvitg se-basond sin art. 12 dalla lescha cantunala da sanadad (DG 500.000) dils 02-12-1984 sin l'ordinaziun cantunala dils 27-10-1998 pertuccont igl uorden da satrar (DG 508.100).

² Ella vala per gl'entir intschess dalla vischnaunca da Sumvitg.

Art. 2 Survigilanza

La survigilanza digl uorden da sepultura e santeri ei incumbensa dalla suprastanza communal. Ella ei responsabla per l'execuziun digl uorden da sepultura e santeri.

Art. 3 Incumbensas

¹ Las incumbensas dalla suprastanza communal ein:

- relaschar disposiziuns per il diever e manteniment dil santeri,
- incaricar e survigilar ils responsabels dil menaschi da sepultura ordeifer la baselgia (cavar e cuvierer las fossas, sfundrar baras),
- ordinar la rumida da fossas suenter la scadenza dil ruaus da fossa,
- dar lubientschas excepziunalas per satrar persunas cun domicil ordeifer la vischnaunca,
- survigilar la formaziun da fossas, dils mortuaris e dallas fossas comunablas,
- controllar ed actualisar il register da fossas, dils mortuaris e dallas fossas comunablas.

II. Determinaziuns specificas davart uorden da sepultura

Art. 4 Metter en vischi

¹ Il defunct astga vegnir mess el vischi pér suenter ch'in miedi ha constatau officialmein la mort.

² En caplutta da morts sco era duront la sepultura sto igl uvierchel dil vischi esser serraus.

³ La finiastra dil vischi astga restar aviarta entochen avon la sepultura.

⁴ Pertuccont metter en vischi baras cun prighel d'infecziun valan las prescripziuns federalas.

Art. 5 Transport dalla bara

Ils vegnentsuenter han da procurar per il transport dalla bara en caplutta da morts ni sin santeri. Las prescripziuns specialas dalla confederaziun e dil cantun restan resalvadas.

Art. 6 Temps da spetga

¹ Ei astga vegnir satrau ni cremau ina bara sil pli baul 48 uras suenter la mort.

² En cass specialas sa il miedi districtual dar ina lubientscha extraordinaria.

Art. 7 Liug da sepultura

¹ Tut ils defuncts ch'ein domiciliai e mieran en la vischnaunca da Sumvitg e tuttas baras anfladas sil territori dalla vischnaunca han il dretg da vegnir satrai en in dils santeris publics dalla vischnaunca.

² A negin astga vegnir snegau ina digna sepultura, ni ord motivs da confessiun ni per auters motivs.

Art. 8 Lubientscha speciala per satrar

Persunas ch'ein buca domiciliadas en la vischnaunca da Sumvitg astgan vegnir satradas en vischnaunca mo cun ina lubientscha speciala dalla suprastanza communal.

Art. 9 Tucchiez

Cuoz ed intensitad dil tucchiez sedrezzan tenor igl usit da tucchiez da mintga vischinadi.

Art. 10 Sepulturas

¹ La pleiv ei responsabla per ils survetschs divins, las preparativas dalla baselgia, la caplutta da morts e las ulteriuras lavurs che succedan enteifer la baselgia avon, duront e suenter la sepultura.

² La vischnaunca ei responsabla per il cavar fossa, preparar la scaffa dil mortuari ni preparar la fossa comunabla per la sepultura. Plinavon ei ella responsabla per sfundrar la bara, cuvierer la fossa ni la scaffa dil mortuari e dalla fossa comunabla e las ulteriuras lavurs che succedan sin santeri avon, duront e suenter la sepultura. Per quella lavur sa ella adossar als vegnentsuenter ina taxa che cuviera ils cuosts.

³ En cass specials sco per exempel tier baras anfladas ni tier baras senza survivents succeda la sepultura en concordanza cun la suprastanza communal.

III. Determinaziuns specificas davart uorden da santeri

Art. 11 Santeris

¹ Il manteniment ordinari dil santeri ei caussa dalla pleiv Sumvitg.

² Il manteniment extraordinari dil santeri ei caussa dalla vischnaunca.

³ Mintga fossa duei vegnir mantenida en bien stan dils vegnentsuenter ni d'ina tiarza persuna.

⁴ Il plantar plontas e caglias sin las fossas ei scumandau.

⁵ Las particularitads dils santeris ston vegnir risguardadas.

Art. 12 Formaziun dil santeri

La suprastanza communal ordinescha la formaziun dils santeris en concordanza cun ils responsabels dalla pleiv.

Art. 13 Register da fossas

La vischnaunca ei responsabla per ils plans da santeris cun l'occupaziun dallas fossas.

Art. 14 Disposiziun dallas fossas

¹ La disposiziun dallas fossas sedrezza tenor il plan da santeri che vegn menaus per mintga santeri.

² En mintga santeri vegn satrau en retscha.

³ Las urnas vegnan sutterradas ni deponidas el liug / mortuari fixau per mintga santeri.

Art. 15 Mesiras e distanzas dallas fossas

¹ La profunditad minimala dallas fossas munta:

- per fossas da carschi ed affons sur 10 onns	1.50 m
- per fossas d'affons sut 10 onns	1.20 m
- per fossas d'urnas	0.80 m

² La suprastonza communal fixescha en concordanza culs responsabels dalla pleiv las distanzas denter las fossas e las retschas, la lunghezia e ladezia dallas fossas, la ladezia ed altezia dallas cruschs e dils monuments.

Art. 16 Fossas specialas

La suprastonza communal fixescha las taxas ed ulteriuras disposiziuns per las fossas specialas sco per exempel la fossa comunabla ni ils mortuaris.

Art. 17 Occupaziun dallas fossas

¹ Scadin vischi e scadina urna vegnan per regla satrai en ina fossa separada.

² Sin giavisch dil defunct ni dils vegnantsuenter sa la suprastonza communal lubir da satrar l'urna en ina fossa occupada ni da satrar pliras urnas en la medema fossa ni nischa. Il temps da ruaus vegn cheutras buca prolunghius.

Art. 18 Ruaus da fossa

¹ Il ruaus da fossa per sutterradas, dils mortuaris e dallas fossas comunablas munta 20 onns.

² Tier fossas che vegnan cavadas si suenter il temps da ruaus ein ossadira ed urnas da satrar dignamein.

Art. 19 Exhumaziun

¹ L'exhumaziun avon la spirada dil temps da ruaus da 20 onns ei scumandada.

² Per excepziuns muort munconza da plaz ni auters motivs basegna ei ina lubientscha speciala dil departament da giustia, segirtad e sanitad dil cantun Grischun.

Art. 20 Revocaziun da fossas

¹ La revocaziun dallas fossas sto succeder sil pli tard suenter 24 onns. Davart la revocaziun da singulas fossas ni d'ina part dil santeri decida la suprastanza communal en concordanza culs responsabels dalla pleiv.

² La revocaziun sto vegnir publicada ufficialmein ed ils vegnentsuenter ston vegni orientai silmeins treis meins avon il termin da revocaziun.

³ La rumida dallas fossas ha da succeder enteifer il temps fixau dalla suprastanza communal entras ils vegnentsuenter. Sche la rumida succeda buca enteifer quei temps, vegn quella fatga entras la vischnaunca cun adossar ils cuosts als vegnentsuenter. Sin damonda alla suprastanza communal exequescha la vischnaunca ni vegn quella lavur surdada a tiarzas personas. Per quella lavur vegn adossau ina taxa.

Art. 21 Qualitad dils vischals

¹ Per sutterradas eis ei da far diever da vischals da lenn lom.

² Ei la bara aunc enzugliada en ina folia da metal ni da plastic, eis ei da procurar avon che satrar a moda cunvegna ch'aria sufficiente hagi access alla bara.

Art. 22 Schurmetg dil santeri

¹ Igl access al santeri ei lubius a mintgin.

² Igl ei specialmein scumandau:

- da far canera e da secuntener a moda disturbonta el santeri,
- da donnegiar ni da tschuffergnar crusch-fossas e monuments sco era igl ulteriur territori da santeri.

IV. Determinaziuns executoricas

Art. 23 Disposiziun penala

Surpassaments da questa lescha vegnan puni cun castitgs entochen frs. 5'000.-- entras la suprastanza communal.

Art. 24 Mieds legals

Encunter decisiuns e disposiziuns dalla suprastanza communal sa vegnir recurriu enteifer 30 dis suenter la comunicaziun alla Dertgira administrativa dil cantun Grischun.

V. Determinaziuns finalas

Art. 25 Abrogaziun

Questa lescha remplazza il "Reglament da sepultura e santeri" dils 5 da mars 2001.

Art. 26 Approbaziun e vigur

Questa lescha ei vegnida approvada dalla radunonza communal dils 15-12-2017 e passa ils 01-01-2018 en vigur.

Il president communal

sig. Armin Candinas

Il canzlist communal

sig. Fabian Collenberg